

gericht sollen werden. Die hindere sol drei werckschüh vnd ein spannē hoch sein/welche höhe auch die andere die bey den seitten seindt/haben sollen. Doch sol deren beide zu vorderst/da der ofen offen ist/hengig/vnnd nuhr zwen werckschüh vnd drey spannen hoch sein/alle aber sollen ein quärschüh vnd ein spannē dick sein: auff dise wendt/dieweil sie nicht sehr dick seindt/damit sie ein grösserē last so inen auffgelegt/tragen mögendt/werden vier pfulbeum gsetzt/vñ mitt leim überstrichen. Dise sollen das rauchloch/so hinauff vñ durch das tach ghet/halten/welches rauchloch nicht allein den rōsten/sonder auch den pfulbeumē dick leim/soll angestrichen werden. Der herdt aber des schmelzofens soll auff alle seitten sechs quärschüh lang sein/mitt zieglen bedeckt vnd haldechtig. Die küspfferin stuck in disen schmelzofen glegt/sollen auff dise weiß heiß gemacht werden. In diesem schmelzofen sollen sie erstmal hart an einander gsetzt werden/allein stein darzwischen gelegt so groß als ein ey/das die hitz des feurs auch darzwischen durchdringē möge/ja auch die zu vnderst im tiegel leigendt/sollē auff ein halben ziegel gelegt/erhöcht werden: das aber nicht die letsten/die bey dem ange des schmelzofens seindt/fallendt/sollen zu inē eiserne bläch/oder kupfferne stuck/so das kupffer widerumb wirt außbereitet/auß dem tiegel erstmal gezogen/darzu glegt werden/vnd zu disen stucken Kinstock oder stein. Darnach in die stuck sollen kolen/darnach glüt gworffen werden. Erstmal sollen die vor ein sanfften feur heiß werden/bald sollē zu inen mehr kolen gethon werden/die zum zeiten einer spannē hoch leigendt. Man muß fürwar zu den vesten kupfferne stuckē ein hefftiger feur habē/dan zu disen die sich gern brechen lassendt. So nuhn die stuck gnügsamlich erhitzet seindt/welchs in zweien stunden pflegt zu geschähen/sollen auß dem aug des schmelzofens eiserne bläch vnnd Kinstock/oder stein hinweg genōmen werden. Darnach die stuck so heiß gemacher sollen nach der ordnung mitt einer krail die zwen zacken hatt/herauß gezogen werden/wie dan diser der Kinstock rōstet/gebraucht. Als dan soll der erst den Kinstocken auffgelegt werden/vnnd mitt ein feustel vom arbeiter so lang geschlagen/bis daß es von einander zerspringe. Je heisser aber ein jetlichs stuck ist je belder wirt es gebrochen/je minder aber je langsamer/dan es wirt hin vnnd wider/wie ein kupffern vhaß gebogen. So nuhn d erst stein gebrochen ist/so sol als dan der ander in seinen bruchstückē glegt vnnd geschlagen werden/so lang bis er von einander spalte/zügleicher weiß sollen auch die andere stuck nach der ordnung zerbrochen werden. Aber die feustel sollen dreier spannē lang/ein spannen breit/auff beiden seittē scharpff sein/aber ire hülzene stil dreier werckschüh lang/die küpfferne bruchstück oder stein so da kalt worden/vnd mitt dem stemppfel gebrochē/oder so noch heiß/mitt feustel zerschlagē/so werden sie in die bereitstuben des kupffers gefürt.

Die hinder wandt A. Die wende die da von den seitten seindt B. Seulen  
C. Das rauchloch D. Stuck so nach der ordnung gsetzt E. Eiserne bläch  
F. Die stein G. Ein krail mitt zweyen zacken H. Ein feustel I.

Aber